



«Vain uossa amo daplü pisser l'üna per l'otra»

Priura Aloisia davart la vita in clostra in temps da pandemia



Causa la pandemia dal coronavirus es la clostra Son Jon a Müstair pel mumaint serrada per giasts ed eir pella populaziun.

MAD

DA FLURIN ANDRY/FMR

■ **Da las nouv sours illa clostra Son Jon a Müstair han be duos damain da 60 ons. Perquai toccan las bleras d'ellas pro la grupp da persunas specialmaing periclitadas dal coronavirus.** «No eschan in nouv sours qua in clostra, lura es il spiritual *Gregor* in chasa ed eir l'administradur», declera la priura *Aloisia Steiner* da Tuer chi'd es gnüda eletta l'on passà d'utuon sco successura da la priura



Domenica Dethomas da Müstair. Pervi da la pandemia dal coronavirus s'ha la vita in clostra müdada in plüs regards.

«Sortin be schi sto propcha esser»

Ch'ellas nun hajan actualmang ingüns giasts, declera la priura, cha la chasa pels giasts saja serrada. Quai vala eir pel museum da la clostra. «No nu vain ingünas visitas e la clostra bandunaina be schi sto propcha esser, p. ex. per ir pro'l meidi.» Ma uschigliö as cuntegnan las sours plainamaing sco prescrit dal chantun: «Tanter da no vaina adüna la distanza da duos fin trais meters, quai vala eir pro l'urazchun e pro la messa», disch priura Aloisia, «no nu dain neir na il man a ningün e scha no vain da tossir faina quai illa foppa dal chandun.»

«Dain bada amo plü ferm»

Sco ch'ella cuntinuescha dan las sours in quist temp da la pandemia amo plü ferm bada a las otras: «No guardain propcha consciaintamaing vicendaivelmaing in fatscha per verer co chi va a las sours ed eir als oters.» Ch'uschea poss-



na avair pisser üna da tschella «e pudain eir reagir svelt schi vess dad esser necessari». Las abitantas da la clostra Son Jon sun, sco cha la priura disch, eir fich gratas chi pon celebrar mincha di la soncha messa. Quai es pussibel perquai cha'l spiritual Gregor abita eir in clostra e nu sto uschea gnir da l'extern in quella. «Actualmaing nu pudaina laschar tour part a la messa ad ingün da la populaziun, e quai es greiv», constata la priura Aloisia, «ma pella sgürezza da tuots stuvaina ans tgnair vi da quist scumond.»

S'infuormond in differentas manieras

La priura e las ot sours illa clostra da Müstair legian eir tuot las infuormaziuns e prescripziuns da la regenza, da l'uffizi episcopal ed eir dal cumün da Val Müstair: «Quellas prescripziuns pigliaina tuottas propcha serius e provain da respettar plainamaing», accentuescha la priura Aloisia, «che cha no fain excepziunamaing eir causa la pandemia es cha no guardain duos jadas l'eivna la saira a las set e mez las novitats illa televisiun.» Quai es ün'ulteriura pussibilità pellas sours per s'infuormar. Cha'ls purtrets fetschan grond'impreschiun, disch la priura, «schi's vezza co cha'ls ospitals e l'economia sun suot squitsch e cha la dischoccupaziun crescha pervi dal coronavirus. No urain per tuots sün tuot il muond cha quist virus possa bainbod gnir cumbattü e chi's possa bainbod darcheu tuornar a la vita normala.»

Pasqua ingon be daperellas

Chi saja grazcha al Segner, malgrà la pandemia dal coronavirus, eir quist on Pasqua, disch la priura Aloisia da la clostra Son Jon a Müstair, be chi sarà üna Pasqua otra co normalmaing. «No sours pudain bainschi celebrar la festa da Pasqua sco üsità, no savain però ch'oters nun han quella pussibilità, e quai ans fa mal.» Cha'ls concretaivels dadour la clostra in cumün e regiun possan as partecipar a la festa be i'l spiert, declera la priura, «perquai includarana in noss'urazchun a tuot ils umans chi nun han la pussibilità da tour part a la festa da Pasqua da quist on.»